

四庫全書

集部

欽定四庫全書

集部

唐詩紀事卷四十三
五

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣陳際龍

欽定四庫全書

唐詩紀事卷四十三

宋 計敏夫 撰

竇參

郎士元

于良史

舒元興

李諒

李賀

呂溫

呂恭

段洪古

何元上

羊士諤

馮宿

柳宗元

吳武陵

邵真

崔膺

衛象

李宣遠

熊孺登

崔立之

郭遵

韋紆

竇參

謫江表久未歸有詩云一自經放逐徘徊無所從便爲
出山雲不隨飛去龍名豈不欲保歸豈不欲早苟無三
月資難適千里道離心與羈思終日常草草人生年幾
齊憂苦則先老誰能假羽翼使我暢懷抱

湖上閑居云避影將息陰自然知音稀向來深林中偶
亦有所窺飛鳥口銜食引雛上高枝高枝但各有安知
宜不宜止止復何云物情何自私

高仲武云參詩祖沈千運比於孟郊尚在廊廡之間然
萬丈水聲落四時松色寒又人生年幾齊憂苦即先老
羽翮未齊而力已具

參字時中爲人矜嚴悻直果於斷初爲萬年尉失囚貶
尉江夏代同舍人罪人義之相德宗與陸贄不平以姦
賄貶死於邕州

郎士元

題劉相公三湘圖云昔別醉衡霍爾來憶南洲今朝平

津邸兼得瀟湘遊
稍辨荆門樹依然
芳杜洲微明三巴
峽咫尺萬里流
去鳥不知倦遠帆
生暮愁涪陽指天
末北渚空悠悠枕
上見漁父坐中常
狎鷗誰言魏闕下
自有東山幽

塞下曲云寶刀塞上兒
身經百戰曾百勝
壯心竟未嫖姚知
白草山頭日初沒
黃沙城下歌聲發
蕭條夜靜邊風吹
獨倚營門望秋月

贈韋司直云聞君感歎二毛
初舊友相依萬里餘烽火

有時驚暫定甲兵無處可安居客來吳越星霜久家在
平陵音信踈昨日風光還入戶登山臨水意何如送張
南史云雨餘深巷靜獨酌定殘春車馬雖嫌僻鶯花不
棄貧蟲聲粘戶網鼠跡印床塵借問山陽會如今有幾
人

高仲武云士元員外河岳英奇人倫秀異自家形國遂
擁大名右丞已後與錢郎更長自丞相已下出使作牧
二公無詩祖餞時論鄙之兩公詞體大約欲同就中郎

公稍更閑雅近於康樂如荒城背流水遠鴈入寒雲又
去鳥不知倦遠帆生暮愁又蕭條夜靜邊風吹獨倚營
門望秋月可齊衡古人掩映時輩又暮蟬不可聽落葉
豈堪聞古人謂謝朓工於發端比之於今有慙沮矣

士元字君胄中山人寶應中選畿縣官詔試中書補渭
南尉歷拾遺郢州刺史

送彭將軍云雙旌漢飛將萬里授橫戈春色臨關盡黃
雲出塞多鼓聲悲絕漠烽戍隔長河莫斷陰山路天驕

已請和

送孫願云悠然富春客憶與暮潮歸擢第人多羨如君
獨步稀亂流江渡淺遠色海山微若訪新安路嚴陵有
釣磯

宿杜氏江樓云適楚豈吾願思歸秋向深故人江樓月
夜夜千里心落葉覺鄉夢烏啼驚越吟寥寥更何有斷
續空城碓

送彭將軍以下二章并贈張
南史詩姚合取爲極元集

于良史

良史爲張徐州建封從事每自吟曰出身三十年髮白
衣猶碧日暮倚朱門從未污袍赤公因爲奏章服焉

春山夜月云春來多勝事賞翫夜忘歸掬水月在手弄
花香滿衣興來無遠近欲去惜芳菲南望鐘鳴處樓臺
深翠微

冬日寄李贊府云地際朝陽滿天邊宿霧收風兼殘雪
起河帶斷水流北闕馳心極南圖尚旅遊登臨思不已
何處得銷憂

閑居寄薛據云隱几讀黃老閑齋耳目清僻居人事少
多病道心生雨洗山林濕鷓鳴池館晴晚來因廢卷行
樂至西城

高武仲云良史工於清雅工於形似如風兼殘雪起河
帶斷冰流吟文未終較然在目

舒元興

大和九年誅王涯等仇士良愈專恣文宗惡之雖登臨
遊幸未嘗爲樂或瞠目獨語左右莫敢進問因題詩曰

輦路生春草上林花滿枝憑高何限意無復侍臣知一日看牡丹或吟曰拆者如語舍者如咽俯者如愁仰者如恍吟罷方省元輿詞不覺嘆息泣下霑衣

李翱在長沙嫁韋中丞愛姬所生女之流落者元輿自京馳詩贈翱曰湘江舞罷忽成悲便脫蠻靴出絳帷誰是蔡邕琴酒客魏公懷舊嫁文姬

元輿婺州人與李訓善同相文宗專附鄭注詭謀謬筭日與訓比敗天下事二人爲之也

元輿授監察御史時坊州刺史汪荆黷貨御史大夫温
造署元輿往訊之於坊州按獄有詩云中部接戎塞頑
山四周遭風冷木長瘦石斲人亦勞牧守苟懷仁瘡之
時爲瘡其愛如赤子始得無啼號奈何貪狼心潤屋沉
脂膏攫搏如猛虎吞噬若狂獒山秃逾高採水窮益深
撈龜魚旣絕跡鹿兔無遺毛氓苦稅外緡吏憂笑中刀
大君明四目燭之洞秋毫眷茲一州命慮齊墜波濤臨
軒詔小臣汝往窮貪饕分明舉公法爲我緩窮騷小臣

誠小心奉命如煎熬飲冰不待夕驅馬凌晨臯及此督
簿書游詞出狴牢門牆見狼狽案牘問腥臊探情與之
言變態如姦揉真非旣巧飾僞意乃深韜去惡猶農夫
稂莠須耘薙恢恢布疎網罪者何由逃自顧孱鈍姿利
器非能操六旬始歸奏霜落秋原蒿寄謝守土臣努力
清郡曹須知聽甚卑勿謂天之高

橋山懷古云軒轅厭代千萬秋綠波浩蕩東南流今來
古徃無不死獨有天地長悠悠我乘驛騎到中部古聞

此地爲渠搜橋山突兀在其左荒榛交鑠寒風愁神仙
天下亦如此况我感促同蜉蝣誰言衣冠葬其下不見
弓劍何人收哀喧叫笑牧童戲陰天月落狐狸遊却思
皇墳立人極車輪馬跡無不周洞庭張樂降元鶴涿鹿
大戰摧蚩尤智勇神天不自大風后力牧輸長籌襄城
迷路問童子帝鄉歸去無人留崆峒求道失遺跡荆山
鑄鼎餘荒邱君不見黃龍飛去山下路斷髯成草風颭
颭

八月五日中部官舍讀唐歷天寶已來追愴故事云將
尋國朝事靜讀柳芳歷八月日之五開卷忽感激正當
天寶末撫事坐追惜仰思聖明帝貽禍在肘腋楊李盜
吏權貪殘日狼籍燕戎伺其便百萬奮長戟兩河連煙
塵二京成瓦礫生人死欲盡揆業猶不息肅宗傳寶圖
寇難連年擊天地方開泰鑄鼎成繼述萬國哭龍衮悲
思動蠻貊自此千秋節不復動金石悲風揚霜天總惟
冷塵席零落太平老東西亂離客徃徃爲余言嗚咽淚

雙滴况當近塞地哀吹起邊笛撫几觀陳文使我心不
懌花萼笑繁華溫泉樹容碧霓裳煙雲盡梨園風雨隔
露囊與金鏡東游驚波溺昔聞歡娛事今日成慘感神
仙不可求劔壘苔文積萬古長恨端蕭蕭秦陵陌

坊州按獄蘇氏庄記室二賢自鄜州走馬相訪留連數
日發後獨坐寂寞因成詩寄之云十年一相見世路信
多岐雲雨易分散山川長間之我銜鳳闕思按獄橋山
陸君在龍驤府掌奏羽檄詞相去百餘里魂夢自相馳

形容在霄臆書札通相思煩君愛我深輕車忽載脂塞
門秋色老霜氣方凝姿此地少平川崗阜相參差誰知
路非遠行者多云疲君能犯勁風信宿凌歎危情親不
自倦下馬開雙眉相對坐沉吟屈指驚歲時萬事且莫
問一盃欣共持陽鳥忽西傾明蟾掛高枝卷簾引瑤玉
滅燭臨霜墀中庭有踈蘆浙浙聞風吹長河卷雲色凝
碧無瑕疵一言開我懷曠然澹希夷悠悠夜方永冷思
偏相宜眉睫無他人與君閑解題陶然叩寂寞更請吟

清詩得意且忘言
何況竹與絲
頃刻過三夕
起坐輕四
支明朝告行去
慘然還別離
出門送君去
君馬揚金羈
迴來坐空堂
寂寞無人知
重重碧雲合
何處尋佳期

李諒

蘇州元日郡齋感懷寄越州元相公杭州白舍人云稱
慶還鄉郡吏歸
端憂明發儼朝衣
首開三百六旬日
新
知四十九年非
當官補拙猶勤慮
遊宦量才已息機
舉
族共資隨月俸
一身惟憶故山薇
舊交邂逅封疆近
老

牧蕭條宴賞稀書札每來同笑語篇章時到借光輝
綵綵暫厭分符竹舟楫初登擁羽旗未知今日情何似
應與幽人事有違

時長安四年也

樂天和李中丞元日寄詩兼呈微之云領郡慙當潦倒
年鄰州喜得平生友又云憑鶯傳語與李六倩鴈將書
寄元九莫嗟一日日催人且貴一年年入手

樂天草諒泗州刺史制云諒自澄城長訖尚書郎中間
再爲州牧三宰劇縣苦心卹隱仁恕及物操刀決滯者

騏有聲諒後爲京兆尹

諒字復言微之有酬復言元日郡齋感懷詩云臘盡殘
銷春又歸逢新別故欲沾衣自驚身上添年幾休繫心
中小是非貴富祝來何所遂聰明鞭得轉無機羞者推
子先拈酒悵望平生舊採薇去日漸加餘日少賀人閑
鬧故人稀椒花麗句開重檢艾髮衰容惜寸輝苦思正
直酬白雪閑觀風色助青旂千官仗下爐煙裏東海西

頭意獨違

祝富貴鞭聰明皆
正旦童稚俗云

李賀

高軒過云華裾織翠青如葱金環壓轡搖玲瓏馬蹄隱
耳聲隆隆入門下馬氣如虹云是東京才子文章鉅公
二十八宿羅心宵元精耿耿貫當中殿前作賦聲摩空
筆補造化天無功龐眉書客感秋蓬誰知死草生華風
我今垂翅附冥鴻他日不羞蛇作龍

退之皇甫湜聯騎
造門賀摠角荷衣

而出命賦此
詩探觚立成

賀以詩謁退之時爲國子博士已送客解帶門人呈卷

旋讀之首篇鴈門太守行云黑雲壓城城欲摧甲光向
月金鱗開却援帶命邀之其詩云黑雲壓城城欲摧甲
光向月金鱗開角聲滿天秋色裏塞上燕脂凝夜紫半
卷紅旗臨易水霜重鼓聲寒不起報君黃金臺上意提
携玉龍爲君死

李商隱作賀小傳云京兆杜牧爲李長吉序狀長吉之
奇甚盡世傳之長吉姊嫁王氏者語長吉之事尤備長
吉細瘦通眉長指爪能苦吟疾書最先爲昌黎韓愈所

知所與遊者王參元揚敬之權璩崔植爲密每旦日出與諸公游未嘗得題然後爲詩如他人思量牽合以及程限爲意常從小奚奴騎距驢背一古破錦囊遇有所得即書投囊中及暮歸太夫人使婢探囊出之見所書多輒曰是兒要當歐出心始已耳上燈與食長吉從婢取書研墨疊紙足成之投他囊中非大醉及弔喪日率如此過亦不復省王楊革時復來探取寫去長吉往往獨騎往京洛所至或時有隨棄之故沈子明家所餘四

卷而已長吉將死時或畫見一緋衣人駕赤虬持一版書若太古篆或霹靂石文者云當召長吉長吉了不能

讀歛下榻叩頭言阿嬭

長吉學語時呼太夫人云

老且病賀不願去

緋衣人笑曰帝成白玉樓立召君爲記天上差樂不苦也長吉獨泣邊人盡見之少之長吉氣絕常所居窻中勃勃有煙氣聞行車嘒管之聲太夫人急止人哭待之如炊五斗黍許時長吉竟死王氏姊非能造作謂長吉者實所見如此嗚呼天蒼蒼而高也上果有帝也耶帝

果有苑囿宮室觀閣之玩耶苟信然則天之高邈帝之
尊嚴亦宜有人物文彩愈此世者何獨畚畚於長吉而
使其不壽耶噫又豈世所謂才而奇者不獨地上少耶
天上亦不多耶長吉生二十六年位不過奉禮太常當
時人亦多排擯毀斥之又豈才而奇者帝獨重之而人
迺不重耶又豈人見會勝帝耶

飛香芝紅滿天春

上雲
樂句

酒酣唱月使倒行
句蹋天磨刀

割紫雲

此硯
句

右張爲取作主客圖

杜牧之序其文集云賀字長吉元和中韓吏部亦頗道其歌詩雲煙綿聯不足爲其態也水之迢迢不足爲其情也春之盎盎不足爲其和也秋之明潔不足爲其格也風檣陣馬不足爲其勇也瓦棺篆鼎不足爲其古也時花美女不足爲其色也荒國侈殿梗莽邱壠不足爲其恨怨悲愁也鯨吐鼉擲牛鬼蛇神不足爲其虛荒幻誕也蓋騷之裔理雖不及辭或過之騷有感怨刺懟言及君臣理亂時有以激發人意乃賀所爲無得有是賀

能採尋前事所以深嘆恨今古未嘗經道者如金銅仙人辭漢歌補梁庾肩吾宮體謠求取情狀離絕遠去筆墨畦逕間亦殊不能知之賀生二十七年死矣世皆曰使賀且未死少加以理奴僕命騷可也

呂溫

字和叔一字化光禮部侍郎渭之子貞元中連中兩科德宗召爲集賢校書後爲治書御史坐王叔文貶道州改衡州年四十而歿有子安衡

溫和張舍人聞琴云迢遞天上直寂寞邱中琴憶爾山
水韻起予仁智心凝情在正始超想踈煩襟凉生子夜
後月照禁垣深遠風靄蘭氣微露清桐陰方襲緇衣慶
永奉南薰吟

贈友人云南山雙喬松擢本皆千尋夕流膏露津朝被
青雲陰負雪出深澗搖風倚高岑明堂久不創雲幹何
森森匠意方雕巧時情正誇淫生材會有用天地豈無

心

道州觀野火詩云南風吹烈火焰焰燒楚澤陽景當晝
連陰天半夜赤過處若彗掃來時如電激豈復辨蕭艾
焉得分玉石蟲蛇盡爍爛虎兕出奔迫積穢一蕩除和
氣始融液堯時旣故授禹稼斯肇迹遍生合穎禾大秀
兩岐麥家有京坻詠人無溝洫感若悟焚如功來歲終
受益

衡州早春云碧水何逶迤東風吹春草煙波千里曲不
辨嵩陽道又云病肺不飲酒傷心不看花唯驚望鄉處

猶自隔長沙

劉夢得序其文曰蚤聞詩禮於先侍郎從梁肅學文章
勇於藝能咸有所祖年益壯志益大遂撥去文學與雋
賢交重氣槩覈名實歆然以致君及物為大欲每與其
徒講疑考要皇王霸強之際臣子忠賢之道出入上下
千百年間詆訶角逐疊發連柱得一善輒盱衡擊節揚
袂頓足信容得色舞于眉端以為按是言修是理合乎
心而氣將之昭昭然若揭日月而行孰能闕其勢而爭

天光者嗚呼言可信而時異道甚長而命窄精氣爲物
其有所歸乎又曰和叔生少遇君而卒以謫似賈生能
明王道似荀卿始學左氏書故其文微爲富艷夫羿之
關弓唯巴蛇九日乃能盡其力而迴注鷦爵亦要中於
尋常之間非羿之手弓有能有不能所遇然也後之達
解者推而廣之知余之素交不相索於文字之內而已
其序如此是以夢得元微之柳子厚悼呂衡州詩并誄
皆以溫功業未濟爲辭

夢得詩曰一夜霜風雕玉芝蒼生望絕士林悲空懷濟
世安人略不見男婚女嫁時遺草一函歸太史旅墳三
尺近要離朔方徒歲行將滿欲為君刊第二碑

微之詩云氣敵三人傑交深一紙書我投冰瑩眼君報
水憐魚脰股唯夸瘦膏肓豈暇除傷心死諸葛憂道不
憂餘

又云望有經綸釣度收宰相刀江文駕風遠雲貌接天
高國待球琳器家藏虎豹韜盡將千載寶埋入五原蒿

又云白馬雙旌隊青山八陣圖請纓期繫敵枕草誓捐
軀勢激三千壯年應四十無遙聞不瞑目非是不憐吳
又云鵬鶚生難敵沉檀死更香兒童喧市井羸老哭碑
堂鴈起沙汀暗雲連海氣黃祝融峯上月幾點北人喪
子厚作誄云元和六年八月日衡州刺史東平呂君卒
君由道州以陟為衡州君之卒二州之人哭者逾月湖
南人重社飲酒是月上戊不酒去樂會哭於神所而歸
君之志與能不施於生人知之者又不過十人世徒讀

君之文章歌君之理行不知二者之於君其末也萬不
試而一出焉猶為當世甚重使君幸得出其什二三巍
然為偉人與世無窮其可涯也

溫孟冬蒲津開河亭作云息駕非窮途未濟豈迷津獨
立大河上北風來吹人雪霜自茲始草本當更新嚴冬
不肅殺何似見陽春

溫有偶然作云悽悽復汲汲忽覺年四十今朝淚滿衣
不是傷春泣又曰中夜兀然坐無言空涕洟丈夫志氣

事兒女安得知可見以其志也

呂恭

呂溫春日與李六景儉及弟恭聯句景儉云始見花滿
枝又見花滿地溫云且持增氣酒莫滴傷心淚恭云深
誠長鬱結芳辰自妍媚景儉云笑歌聊永日誰知此時
意溫又有同恭歲暮寄晉州李協律詩其略曰伊我抱
微尚仲氏即心期討論自少小形影相差池此來胷中
氣欲耀天下奇雲衢兩沛艾煙閣雙萎蕤幾年困方枘

一旦失多歧道因窮理悟命以盡性知皆失志之狀也
呂渭四子溫恭儉遜柳宗元誌恭墓云以為賢豪絕人
又云恭之妻裴延齡女也

段洪古

洪古澧州人呂溫守道州時洪古客焉洪古奉陪郎中
使君樓上夜把火看花詩云城上芳園花滿枝城頭太
守夜看時為報林中高舉燭感人情思欲題詩溫答段
秀才云盡日看花君不來江城半夜為君開樓中共指

南園火紅燼隨花落碧苔

溫送段秀才歸澧州云湘南孤白芷幽託在清潯豈有
馨香發空勞知處深推賢路已隔賑乏力不任慙我一
言分負君千里心寸義薄聯組片誠兼敵金方期踐冰
雪無使弱思侵

何元上

呂溫知道州時元上居此州謂之何處士

元上有所居寺院涼夜書情呈溫云庾公念病宜清暑

遣向僧家占上方，月光似水衣裳濕。
松氣如秋枕簟涼，幸以薄才當客次。
無因弱羽逐鸞翔，何由一示雲霄路。
腸斷星星兩鬢霜。

溫答云：意氣曾傾四國豪，偶來幽寺息塵勞。
嚴陵釣處江初滿，梁甫吟時月正高。
新識幾人知杞梓，故園何歲長蓬蒿。
期君自致青雲上，不用傷心歎二毛。

溫又有送何山人之容州詩云：匣有青萍筍有書，何門不可曳長裾。
應須定取真知者，遣對明君說子虛。

羊士諤

小園春至偶書呈竇郎中孟員外云松篠雖苦節冰霜
慘其間欣欣發佳色如喜東風還幽抱想前躅冥鴻度
南山春臺一以眺達士未解顏偃息非老圃沉吟闕元
關馳暉忽復失壯歲不得閑君子當濟物丹梯難共攀
心期自有約去掃蒼苔班

酬西川獨孤侍御見寄云百雉層城上將壇列營西照
雪峯寒文章立事須銘鼎談笑論功耻據鞍草檄青油

推健筆曳裾黃閣聳危冠雙金未比三年字負弩空慙
知者難

亂後曲江云憶昔曾遊曲水濱來春長有探春人遊春
人靜空池在直至春深不似春

順宗實錄云元年六月貶宣州巡官羊士諤為汀州寧
化縣尉士諤性傾險時以公事至京遇叔文用事朋黨
相煽頗不能平公言其非叔文聞之怒欲下詔斬之執
誼不可則令杖殺之又不可遂貶焉由是叔文始大惡

執誼士諤受知李吉甫又最善呂溫薦為御史嘗為資
州刺史

張為主客圖以樂天為廣大教化主士諤為入室取其

句云風泉留古顏笙磬相遺音

歷山句

桂朽有遺馥鸞飛

安可待

句

塵沙靄如霧長波驚颺度鴈起汀州寒馬嘶

高城暮銀釭倦秋館綺瑟瞻永路重有携手期清光倚

玉樹

士諤望女几山早歲有卜築之志云望女山頭春雪銷

路傍仙杏發柔條，心思欲去知何日。惆悵迴車上野橋，
酬蕭使君出妓夜讌見送云。玉顏紅燭忽驚春，微步凌
波拂暗塵。自是當歌歛眉黛，不應惆悵為行人。郡樓晴
雪，云霽色朝雲盡。亭高露亦晞，褰開臨曲檻。蕭瑟換輕
衣，地遠秦人望天晴。社燕飛無功，慙歲晚唯念故山歸。
息舟荆溪入陽羨，南山遊善權寺呈李功曹云。結纜蘭
渚曉，紫崑上連崗。晏溫值初霽，去遠山河長。獻歲冰雪
盡，細泉生路傍。行披煙杉入激澗，橫石梁。層閣表精廬。

飛甍切雲翔冲襟得高步清眺極遠方潭嶂積佳氣
英多早芳具觀澤國秀重使春心傷念遵煩促途榮利
驚隙光勉君脫冠意共匿無何鄉尋山家云獨訪山家
歇還涉茅屋斜連隔松葉主人聞語未開門繞籬野菜
飛黃蝶

馮宿

宿字拱之婺州人爲裴度彰義判官徐州張建封掌書
記歷工刑二侍郎

宿尹河南樂天夢得以詩送之宿酬云共稱洛邑難其
選何幸天書用不才遙約和風新草木且令新雪靜塵
埃臨歧有愧傾三省別酌無辭醉百盃明歲杏園花下
集須知春色自東來

每春嘗接諸
公杏園宴會

柳宗元

宗元種柳戲題云柳州柳刺史種柳柳江邊談笑為故
事推移成昔年垂陰當覆地聳幹會參天好作思人樹
慚無惠化傳

南澗中題云秋氣集南澗獨遊亭午時迴風一蕭瑟林
影久參差始至若有得稍深遂忘疲羈禽響幽谷寒藻
舞淪漪去國寬已遊懷人淚空垂孤生易爲感失路少
所宜寂寞竟何事徘徊祇自知誰爲後來者當與此心
期

漁翁云漁翁夜傍西巖宿曉汲清湘燃楚竹煙銷日出
不見人歎乃一聲山水綠迴看天際下中流巖上無心
雲相逐

子厚與楊誨之書云吾年十七求進士四年乃得舉二
十四求博學宏詞二年乃得仕及爲藍田尉走謁六官
堂下與卒伍爲列益學老子和光同塵雖自以爲得然
已得號爲輕薄人矣及爲御史郎官自以登朝廷利害
益大雖戒礪益切卒不免爲連累廢逐

子厚陷王叔文
之黨遷謫卒死

於柳州柳人
立廟羅池

雪詩云千山鳥飛絕萬徑人蹤滅孤舟蓑笠翁獨釣寒

江雪

視鄭谷亂飄僧舍之句
不侔矣東坡居士云

子厚死三年愚溪無復曩時矣劉夢得聞之賦三絕云

溪水悠悠春自來草堂無主燕飛迴隔簾惟見中庭草

一樹山榴依舊開

其一

草聖數行留壞壁木奴千樹屬鄰家唯見里門通德榜

殘陽寂寞出樵車

其二

柳門竹巷依依在野草青苔日日多縱有鄰人解吹笛

山陽舊侶更誰過

其三

吳武陵

貢院樓北新栽小松詩云拂檻愛貞容移根自遠峯已
從芳草沒終不任苔封葉小初臨雪鱗生欲狀龍承春
濯雨露得地近垣墉逐吹風微動含煙色漸濃時迴日
月照爲謝小山松

武陵有文而強扞嘗爲韶州刺史贓罪狼籍勅令廣州
幕吏鞠之科第少年殊不假貸持之頗急武陵不勝其
忿題詩路左佛廟曰雀兒來逐颺風高下視鷹鷂意氣
豪自謂能生千里翼黃昏依舊委蓬蒿尋貶潘州司戶

卒時太和八年也

或云李渤為桂管觀察吳為副因宴大醉渤命銜校米蘭梟之明日乃悟

其太過釋之

故武陵詩云

武陵信州人為太學博士大和初薦杜牧於崔郾牧第
五人登第初李愬節度唐鄧武陵薦李景儉王湘捷智
沈敏可表以自副時號知人

邵真

尋人偶題云日昃不復午落花難歸樹人生能幾何莫
厭相逢遇

真爲李寶臣成德軍掌書記後從李惟岳之叛與田悅
李正己拒命真諫之惟岳寤使真作奏復爲將之所沮
德宗詔張孝忠朱滔合兵討大敗之悅嬰城惟岳召真
議歸順悅遣扈宍來責惟岳且欲斬真惟岳懼斬真以
謝焉其後王武俊表其忠贈戶部尚書

崔膺

感興云富貴難義合困窮易感恩古來忠烈士多出貧
賤門世上桃李樹但結繁華子白屋抱關人青雲壯心

死本以勢利交勢盡交情已如何失情後始歎門易軌
膺博陵人性狂少長於外家不齒及長能文作道傍孤
兒歌以諷外家張建封愛其才以爲客夜中大叫驚軍
衆欲食其肉建封藏之明日置宴監軍曰某有請請崔
膺建封曰如約逡巡建封又曰某亦有請却請崔膺坐
中皆笑乃獲免膺賦別佳人云壠上流泉壠下分斷腸
嗚咽不堪聞常娥一入月中去巫峽千秋空白雲

或云
崔涯

詩

李涉醉中贈膺詩云與君兄弟匡嶺故與君相逢楊子
渡白浪南分吳塞雲綠楊西入隋宮路隋家文物今雖
改舞館歌臺基尚在煬帝陵邊草木深汴河流水空歸
海今古悠悠人自別此地繁華人未歇大道青樓夾翠
煙瓊幄繡帳開明月與君一言兩相許外捨形骸中爾
汝揚州歌酒不可追洛神映箔湘妃語白馬黃金爲身
置誰能獨羨他人醉暫到香爐一夕間能展愁眉百年
事君看白日光如箭一度別來顏色變早謀侯印佩腰

間莫遣看花鬢如霰

衛象

古詞云鵲血瑠弓濕未乾
鵬鷲新染劔花寒
遼東老將鬢成雪
猶向梳頭夜夜看

傷李端云才子浮生促
泉臺此路賒
官卑楊執戟
年少賈長沙
人去門棲鵬
穴成酒誤蛇
唯餘封禪草
留在陵家

段成式云大歷末禪師元鑒住荊州陟岵寺道高有風

韻人不可得而親張璪嘗畫松於齋壁符載贊之象詠
之時號三絕悉加堊焉人問之曰無事疥吾壁也其徒
有殺物命者弗之責有高行者亦不稱或怪之乃題詩
於竹曰大海從魚躍長空任鳥飛乃知象大歷間江陵
詩人也

李宣遠

并州路作云秋日并州路黃榆落照間孤城吹角罷數
騎射鵬還帳幕遙臨水牛羊自下山征人共垂淚烽火

起雲間

近無西耗云遠戎兵壓境遷客淚橫襟烽候驚秦塞囚
居困越吟自憐牛馬走未識犬羊心一月無消息西看
日又沉

宣遠貞元進士登第

熊孺登

至日荷李常侍過郊居云賤子守柴荆誰人記姓名風
雲千騎降草木一陽生禮異江河動歡殊里巷驚稱觴

容侍坐看竹許同行遇覺滄溟淺思疑太嶽輕盡搜天
地物無諭此時情

和竇中丞歲酒喜見小男兩歲云更添十歲應爲相歲
酒從今把未休聞得一毛添五色眼相看逐鳳池頭

劉夢得送湘陽熊判官孺登府罷歸鍾陵因寄江西裴
中丞詩云射策志未就從事歲云除篋留馬卿賦袖有
劉宏書忽見夏木陰悵然憶吾廬復持州民刺歸謁專

城居

樂天洪州逢孺登詩云靖安院裏新黃下醉笑狂吟氣
最羸莫問別來多少苦低頭看取白髭鬚

孺登鍾陵人登進士第終於藩鎮從事

崔立之

南至隔仗望含元殿香爐詩云千官望長至萬國拜含
元隔仗爐光出浮霜煙氣翻颼颼紫內殿漠漠澹前軒
聖日開如捧卿雲近欲渾輪囷灑宮闕蕭索散乾坤願
倚天風便披香奉至尊

退之贈崔立之評事詩云崔侯文章苦捷敏高浪駕天
輸不盡曾從闕外來上都隨身卷軸車連軫朝爲百賦
猶辭怒暮作千詩轉道緊詩意殊憫其窮

立之登貞元進士第

郭遵

南至日隔仗望含元殿香爐詩云冕旒親負宸弁服盡
朝天暘谷移初日金爐出御煙芬馨流遠近散漫入貂
蟬霜仗凝逾白朱欄映轉鮮如看浮闕在稍覺逐風遷

為沐皇家慶來瞻羽衛前

遵登貞元進士第

韋紆

南至日隔仗望含元殿香爐云抗殿䟽元首高高接上
玄節當南至日星是北辰天寶戟羅仙仗金爐引瑞煙
霏微雙闕麗溶洩九州連拂曙祥光滿分晴曉色鮮一
陽今在歷生植願陶甄紆貞元進士也

唐詩紀事卷四十三

欽定四庫全書

唐詩紀事卷四十四

宋 計敏夫 撰

王建

宮詞一百首

蓬萊正殿壓金黿
紅日初生碧海濤
開着五門遙北望
柘黃新帕御床高

殿前傳點各依班
召對西來八詔蠻
上得青花龍尾道
側身偷覩正南山

龍煙日氣紫瞳瞳
宣政門當玉殿風
五刻閣前卿相出

下簾聲在半天中

白玉窻中起草臣櫻桃初出賜嘗新
殿頭傳語金階遠
因進詞來謝聖人

內人對御疊花牋綉坐移來玉案邊
紅蠟燭前呈草本
平明昇出閣門宣

千牛仗下放朝初玉案傍邊立起居
每日請來金鳳紙
殿頭無事不教書

延英引對碧衣郎江硯宣毫各別床
天子下簾親考試

宮人手裏過茶湯

此詩亦云微之作

未明開着九重關
金畫黃龍五色幡
直到銀床排仗合
聖人三殿對西番

少年天子愛邊功
親到凌煙畫閣中
教覓勲臣寫圖本
長教殿裏作屏風

丹鳳樓門把火開
先排法駕出蓬萊
棚前走馬人傳語
天子南郊一宿迴

樓前立仗看宣赦
萬歲聲長再拜齊
日照綵盤高百尺

飛仙爭上取金雞

集賢殿裏圖書滿點勘頭邊御印同真跡進來依字數
別收鑲在玉函中

秋殿清齋刻漏長紫微宮女夜焚香拜陵日到公卿發
鹵簿分頭入太常

新調白馬怕鞭聲供奉騎來遠殿行爲報諸王侵早起
隔門催進打毬名

對御難爭第一籌殿前不打背身毬內人唱好龜茲急

天子龍輿過玉樓

新衫一樣殿頭黃
銀帶排方獼尾長
摠把金鞭騎御馬
綠綬紅額麝煙香

羅衫葉葉綉重重
金鳳銀鵝各一叢
每遍舞頭分兩向
太平萬歲字當中

魚藻宮中鎖翠娥
先皇行處不曾過
如今池底休鋪錦
菱角鴟頭積漸多

殿前明日中和節
連夜瓊林散舞衣
傳報所司供蠟燭

監門金鎖放人歸

五更五點索金車盡放宮人出看花仗下一時催立馬
殿頭先報內園家

城東南北望雲樓半下珠簾半上鈎騎馬行人長遠過
忽防天子在樓頭

射生宮女宿紅粧請得新弓各自張臨上馬時齊賜酒
男兒跪拜謝君王

新秋白兔大於拳紅耳霜毛趁草眠天子不教人射煞

玉鞭遮到馬蹄前

內鷹籠脫解紅縞戴勝爭飛出手高直到碧雲還却下
一雙金爪菊花毛

競渡舡頭掉綵旗兩邊泥水濕羅衣池東爭向池西岸
先到先書上字歸

燈前飛入玉塔蟲未卧嘗聞半夜鐘看着中元齋日到
自盤金線綉真容

步行送出長門遠不許來辭舊院花只恐他時身到此

乞來自在得還家

一時起立吹簫管得寵人來滿殿迎整頓衣裳皆着節
舞頭當拍第三聲

琵琶先抹六么頭小管丁寧側調愁半夜美人雙起唱
一聲聲出鳳凰樓

春池日暖少風波花裏牽舡水上歌遙索劍南新樣錦
東宮先釣得魚多

十三初學擘瑩篔弟子名中被點留昨日教坊新進入

並房宮女與梳頭

紅蠻捍撥帖胷前移坐當頭近御筵用力獨彈金殿響
鳳凰飛出四條絃

春風吹曲信旗竿自得深宮不怕寒誇道自家先上馬
團中橫過覓人看

粟金腰帶象牙錐散插紅翎玉突支旋獵一邊還引馬
歸來花鴨遶鞍垂

雲駝月驄各試行一般毛色一般纓殿前來往重騎過

欲得天恩別賜名

每夜停燈熨御衣
銀燠籠底火
霏霏遙聽帳裏君王覺
上直聲鐘始得歸

因喫櫻桃病放歸
三年着破舊羅衣
內中侍從來還去
結得金花上貴妃

欲迎天子看花去
下得金堦却悔行
恐見失恩人
舊院迴來憶着五絃聲

往來舊院不堪修
近敕宣徽別起樓
聞有美人新入內

宮中未識大家愁

自誇歌舞勝諸人，恨未承恩出內頻。
連夜宮中修理院，地衣簾額一時新。

悶來無處可思量，旋下金階旋下床。
收得山丹紅藥粉，牕中洗却麝香黃。

嫌羅不着索輕繡，對面交人染褪紅。
衫子成來一遍出，今朝看處滿園中。

合暗報來門鎖了，夜深應別喚笙歌。
房中下着珠簾睡。

月過金堦白露多

御厨不食索時新
每見花開即苦春
白日卧多嬌似病
隔簾教喚女醫人

藪藪洗手遠金盆
旋拭紅巾入殿門
衆裏遙拋金橘子
在前收得便承恩

御波水色春來好
處處分流白玉渠
密奏君王知入月
喚人相伴洗裙裾

移來女樂部頭邊
新賜花檀大五絃
縱得紅羅手帕子

當心香畫一雙蟬

新晴草色暖溫暾山雪初消漸出渾今日踏青歸校晚
傳聲留着苑東門

兩簷新換珠簾額中尉明朝設內家一樣金盤五千箇
紅蘇點出牡丹花

舞送香毬出內家記巡傳把一枝花散時各自燒紅燭
相逐行歸不上車

家常愛着舊衣裳空戴紅梳不作粧忽地下堦衣帶解

非時應得見君王

宣勅教歌不出房一聲一通報君王再三博士留殘拍
索向宣徽作徽章

行中第一頭先舞博士傍邊亦被欺忽覺管絃偷急遍
翩翩羅袖不教知

同黃縫校捨釵梳欲得金仙觀內居近被天恩知識字
收來按上檢文書

月冷江清近臘時玉塔金瓦雪淅淅浴堂門外抄名入

公主家人謝面脂

未承恩澤一家愁
乍到宮中憶外頭
求首管絃聲款逐
側商調裏唱伊州

東風潑潑雨新休
弄盡春風蕩雪溝
走馬犢車當御路
漢陽公主進雞毬

風簾水閣壓芙蓉
四面鈎欄在水中
避熱不歸金殿宿
秋河織女夜燈紅

聖人生日明朝是
私地先須屬內監
自寫金花紅榜子

前頭先進鳳凰衫

避脫昭儀不擲盧井邊
含水噴鴟雛內中數日無呼喚
駕得滕王蛺蝶圖

內宴初秋入二更
殿前燈火一天明
宮官分半音聲住
諸院門開觸處行

玉蟬金掌三層插
翠髻高鬟綠鬢虛
舞處春風吹落地
歸來別賜一頭梳

樹葉初成鳥出窠
石榴花裏笑聲多
舞中遺却金釵子

拾得從他要賞羅

小殿新裝粉欲乾
貴妃姊妹盡來看
爲逢好日先移入
續向街西索牡丹

內人相續報花開
准擬君王便看來
縫着五絃琴綉袋
宜春院裏按歌迴

巡吹慢遍不相和
暗看誰人曲校多
明日梨花園裏見
先須逐得內家歌

黃金合裏盛紅雪
重結香羅四出花
一一傍邊書勅字

分明送與大臣家

未明東上閣門開排仗聲從後殿來阿監兩邊相對立
遙聞索馬一時迴

宮人早起笑相呼不識堦前掃地夫乞與金錢爭借問
外頭還似此間無

小隨阿姊學吹笙好見君王乞與名夜掃玉床朝把鏡
黃金堦下不教行

日高殿裏有香煙萬歲聲來動九天妃子院中初降誕

內人爭乞洗兒錢

宮花不共外邊同正月長生一朵紅供御櫻桃看守別
直無鷓鴣在園中

殿前鋪設兩邊樓寒食宮人步打毬一半走來爭跪拜
上棚先謝得頭籌

太儀前日暖房來囑和昭陽乞藥栽勅賜一窠紅躑躅
謝恩未了奏花開

床前謝賜紫羅襦不下金階上軟輿官局揔來為喜樂

院中新拜內尚書

鸚鵡誰教轉舌關
內人手裏養來姦
語多近更承恩澤
數對君王憶隴山

分明閑坐賭櫻桃
休却投壺玉腕勞
各把沉香雙陸子
局中鬪得壘高高

禁寺紅樓內裏通
笙歌引駕夾城中
裏頭官監當前立
手把牙鞘竹彈弓

春風院院落花堆
金鎖衣生掣不開
更築歌臺起粧殿

明朝先進畫圖來

舞來汗濕羅衣徹樓上人扶下玉梯歸到院中重洗面
金盆水裏撥紅泥

宿粧殘粉未明天摠在朝陽花樹邊寒食內人長白打
庫中先散與金錢

衆中愛得君王笑偷把金箱筆硯開書破紅蠻隔子上
旋催當直美人來

後宮宮女無多少起得園中笑一團舞蝶落花相看着

春風共語亦應難

黛眉小婦研裙長
惣被抄名入教坊
春設殿前多隊舞
棚頭各別請衣裳

水中芹葉土中花
拾得還將避衆家
惣待別人般數盡
袖中捻得鬱金牙

玉簫改調移纖指
催赴紅羅綉舞筵
未着柘枝花帽子
兩行宮監在簾前

總總戶戶院相當
惣有珠簾玳瑁床
雖道君王不來宿

帳中長是炷衙香

銀燭秋光冷畫屏
輕羅小扇撲飛螢
天階夜色涼如水
臥看牽牛織女星

雨入珠簾滿殿涼
避風新出石盆湯
內人恐要秋衣著
不住熏籠換好香

金吾除夜進儺名
畫袴朱衣四隊行
院院燒燈如白日
沉香火底坐吹笙

樹頭樹底覓殘紅
一片西飛一片東
自是桃花貪結子

錯教人恨五更風

金殿當頭紫閣重仙人掌上玉芙蓉
太平天子朝迎日
五色雲車駕六龍

日晚長秋簾外報望陵歌舞在明朝
添爐欲熱熏衣麝
憶得分時不忍燒

日映西陵松栢枝下臺相顧一相悲
朝來樂部歌新曲
唱着君王自作詞

淚盡羅中夢不成夜深前殿按歌聲
紅顏未老恩先斷

斜倚熏籠坐到明

新鷹初放兔方肥
白日君王在內稀
薄暮千門臨欲鎖
紅粧飛騎向前歸

黃金捍撥紫檀槽
絃索初張調更高
盡理昨來新上曲
內官簾外送櫻桃

鴛鴦瓦上忽然驚
晝寢宮娥夢裏聲
元是吾皇金彈子
海棠窠下打流鶯

寶仗平明金殿開
暫將紈扇共徘徊
玉顏不及寒鴟色

猶帶昭陽日影來

閑吹玉殿昭華管醉打梨園縹蒂花千年一夢歸人世
絳縷猶封繫臂紗

建初爲渭南尉值內官王樞密者盡宗人之分然彼我
不均復懷輕謗之色忽過飲語及漢元靈信任中官起
黨錮興廢之事樞密深憾其譏乃曰吾弟所有宮詞天
下皆誦於口禁掖深遠何以知之建不能對後爲詩以
贈之乃脫其禍建詩曰先朝行坐鎮相隨今上春宮見

長時脫下御衣偏得着
進來龍馬每教騎
常承密旨還家少
獨對邊情出殿遲
不是當家頻向說
九重爭遣外人知

上李庶子云紫煙樓閣碧沙亭
上界詩仙獨自行
奇險驅回還寂寞
雲山經用始鮮明
藕綃紋縷裁衣滑
鏡水波濤濾得清
昏思願因秋露洗
幸容階底禮先生
建赴陝州司馬樂天夢
得以詩送之夢得詩云
暫輟清嚴出太常
空携詩卷赴甘棠
府公既有朝中舊
司馬應容酒

後狂案牘來時唯署字風煙入興便成章兩京大道多
遊客每遇詞人戰一場樂天詩云陝州司馬去何如養
靜資貧兩有餘公事閑忙同少尹俸錢多少敵尚書只
携美酒閑爲伴惟作新詩趁下車自有鐵牛無詠者計
君投刃必應虛

張籍贈建詩云早在山東聲價遠曾將順策佐嫖姚識
來詩句無閑語老去官班未入朝身屈只聞詞客說居
貧多見野僧招獨從詩閣歸來晚春水橋邊看柳條

建大歷進士爲昭應丞太府寺丞終於司馬建在昭陽
楊巨源寄詩曰武皇金輅輶香塵每歲朝元及此辰光
動泉心初浴日氣蒸山腹揔成春謳歌日入雲韶曲詞
賦方歸侍從臣瑞靄朝朝猶望幸天教赤縣有詩人

唐詩紀事卷四十四

欽定四庫全書

唐詩紀事卷四十五

宋 計敏夫 撰

朱灣

王良會

柳公綽

張正壹

徐放

崔備

蘇郁

胡幽貞

張儼

杜顏

章丹

鄭俞

杜元穎

吳丹

鄭餘慶

趙宗儒

周弘亮

王播

周匡物

許孜

張碧

朱灣

壁畫古松詩云石上盤古根謂言天生朽安知草木性
變在畫師手陰深方丈間真趣幽且閑木紋離披勢搓
梓中裂空心火燒出掃成三寸五寸枝便作千年萬年
物莓苔濃淡意不同一半死皮藏蠹蟲風霜未必來到
此氣色杳似寒山中孤標可翫不可取能使支公道場
古

平陵寓居再逢寒食云幾迴江上泣途窮每遇良晨歎

轉蓬火燧知從新節變灰心還與故人同莫聽黃鳥啼
愁處自有花開向客中貧病固應無撓事但將懷抱醉
春風

逼寒節寄崔七云開庭只是長莓苔三徑曾無車馬來
旅館尚愁寒食火羈心懶向不燃灰門前下客雖彈鋏
溪畔窮魚且曝腮他日趨庭因問禮須言陋巷有顏回
九日登青山云昔人惆悵地繫馬又登臨舊處煙霞在
多時草木深水將空合色雲共我無心想見龍山會良

辰亦似今

灣別湖州崔使君偁書云灣聞蓬萊之山藏杳冥而可
到驪龍之珠潛潢澗而可識貴人之顏無因而前不可
識灣自假道路問津主人一身孤雲兩度圓月凡再請
職事三趨戟門門人謂灣曰子私來耶公來耶若言公
僕實非公若言私公庭無私以茲交戰彷徨于今信知
庭之與堂不啻千里况寄食漂母夜眠漁舟門如龍而
難登食如玉而難得如龍之門轉深如玉之粟轉貴實

無機心翻成機事漢陰丈人聞之豈不大笑屬谿上風
便囊中金貧望甘棠而歎自引分而退也

高仲武云朱灣率履正素放情江湖郡國交辟潛糴不
起有唐高人也詩體幽遠興用洪深因詞寓意窮理盡
性於詠物尤工如受氣何曾異開花獨自遲所謂哀而
不傷國風之深者也

灣爲李勉永平從事灣秋夜燕王郎中宅賦得露中菊
云衆芳春競發寒菊露偏滋受氣何曾異開花獨自遲

晚成猶有分欲採未過時忍棄東籬下看隨秋草衰
賦得白鶴翔翠微送陳偃下第云不知鷗與鶴天畔弄
晴暉背日分明見臨川相映微淨中雲一點迴去雪孤
飛正好南枝住翩翩何所依

長安喜雪云千門萬戶雪花浮點點無聲落瓦溝全似
玉塵消更積半成冰片結還流光含曉色清天苑輕逐
微風遠御樓平地已霑盈尺潤年豐須荷富人侯

右三
詩韋

莊取爲
又元集

王良會

武元衡鎮西蜀有中秋夜錦樓望月詩云玉輪初滿空
迥出錦城東相向秦樓鏡分飛碣石鴻桂香隨窈窕珠
綴隔玲瓏不及前秋見團圓鳳沼中

良會和云德星搖此夜珥月滿重城杳靄煙氣色颺颺
砧杵聲令行秋氣爽樂感素風輕共賞千年聖長歌四

海清

得清
字

良會以內侍省內侍省爲監軍使

柳公綽

和錦樓翫月詩云此夜年年月偏宜此地逢近看江水
淺遙辨雪山重萬井金花肅千林玉露濃不唯樓上思

飛蓋亦陪從

得濃字

公綽裴度同爲西蜀武元衡判官綽先入爲吏部郎中
度有詩曰兩人同日事征西今日君先奉紫泥

公綽字寬京兆人時爲西川營田副使兼少尹後終於
刑部尚書取士如許康佐崔與李拭韋長皆知名貴顯

云

張正壹

和錦樓翫月詩云高秋今夜月皓色正蒼蒼遠水澄如
練孤鴻迥帶霜旅人方積思繁宿稍沉光朱檻叨陪賞

尤宜清漏長

得蒼
字

正壹時爲西川觀察判官

正壹德宗末年爲左補闕以上書召見王叔文之黨疑
正壹言已陰事令韋執誼反譖於上乃與所善王仲舒

劉伯芻皆坐遠貶

徐放

和錦樓翫月詩云玉露中秋夜金波碧落開鵲驚初泛
濫鴻思共徘徊遠目清光徧高空爽氣來此時陪永望
更得上燕臺

放字達夫元衡西川從事元和九年爲衢州刺史見退
之徐偃王廟碑

崔備

得前字秋
字二篇

和錦樓翫月詩云清景同千里寒光盡一年竟天多鴈
過通夕少人眠照別江樓上添愁野帳前隋侯思未報
猶有夜珠圓

又云四時皆有月一夜獨當秋照曜初含露徘徊正滿
樓遙連雪山淨迥入錦江流願以清光末年年計從遊
備時爲西川度支判官

備使院憶山中道侶兼懷李約云松竹去名嶽衡茅思
舊居山君水上印天女月中書舊秩芸香在空奩藥氣

餘褐衣寬易攬白髮少難梳病柳傷摧折殘花惜掃除
憶巢同倦鳥避網甚跳魚阮巷慙交絕商高愧跡踈與
君非官侶何日共樵漁

清溪路中寄諸公云偏郡隔雲岑迴溪路更深少留攀
桂樹長渴望梅林野筍資公膳山花慰客心別來無信
息可謂井瓶沉

備登建中進士第終工部郎中

備侶
兄弟

元衡中秋夜聽歌聯句此夕來奔月何時去上天備雲

鬢方自照玉腕更呈鮮度嫵婉人間意颺颺物外緣公

上相詩裁明月扇歌索想夫憐元衡奉暗染荀香久長

隨楚夢偏放會當來彩鳳髣髴逐神仙士玫元衡在蜀

淡於接物而開府極一時選公綽爲少尹正壹觀察判
官備度支判官裴度掌書記盧士玫觀察推官楊嗣復
節度推官

蘇郁

鸚鵡詞云莫把金籠閉鸚鵡箇箇分明解人語忽然更

向君前語三十六宮愁幾許

和戎詩云關月夜懸青塚鏡寒雲秋薄漢宮羅君王莫
信和親策生得胡雛轉更多

郁貞元元和間詩人十二樓藏玉堞中鳳凰雙宿碧芙蓉
流霞淺酌誰同醉今夜笙歌第幾重

步虛吟倚雨殘
詞

樹月收山下村句右張爲取作主客圖

胡幽貞

題西施浣沙石云一朝入紫宮萬古遺芳塵至今溪邊

花不敢嬌青春

歸四明詩云海色連四明仙舟去容易天籍豈輒問不
是卑朝士

張爲取二詩作主客圖

張儼

貞元八年十二月謁先主廟絕句三首其一云仗順繼
皇業并吞勢由已天命屈雄圖誰歌大風起其二得股
肱賢明能以奇用兵何事傷客情何人歸帝京其三雄

名垂竹帛荒陵壓阡陌終古更何聞悲風入松栢

杜頽

故絳行云君不見銅鞮觀數里城池已蕪漫君不見虜
祁宮幾重臺榭亦微蒙介馬兵車全盛時歌童舞女妖
豔姿一代繁華皆共絕九原唯望塚累累

韋丹

江西韋大夫丹與東林靈澈上人爲忘形之契丹嘗爲
思歸絕句以寄澈公云王事紛紛無暇日浮生冉冉只

如雲已爲平子歸休計五老崑前必共聞
澈奉酬詩曰
年老身閑無外事麻衣草坐亦容身
相逢盡道休官去
林下何曾見一人

丹字分明京兆人
幼孤從外祖顏真鄉元和中守江西
功第一

鄭俞

玉水記方流詩云積水綦文動因知玉德幽如天含素
色侔地引方流潛潤滋雲起熒華射浪浮魚龍水不夜

草木岸無秋壁沼寧堪比瑤池詎可儔若非懸坐測猶
得冀冥搜

俞登貞元十六年進士第杜元穎吳丹白樂天皆同年
登科樂天爲河南尹俞始受長水縣令樂天四雖吟云
命雖薄猶勝於鄭長水

杜元穎

玉水記方流詩云重泉生美玉積水異常流始玩清堪
賞因知寶可求斗回清氣見磬折紫花浮中矩皆明德

同方叶至柔月華偏共映風韻喚將遊遇鑒終無暗逢
時願見收

元穎淹之孫也貞元末登第敏文辭憲宗時所賞嘆穆
宗立拜中書舍人不閱歲至宰相再葺鎮蜀敬宗驕僻
元穎哀歛上供削軍食遂啓南詔之寇斥爲循州司馬
死貶所在蜀時官屬崔瓚訖于衆盧并奪秩分逐之

吳丹

玉水記方流詩云玉泉何處記四折水紋浮淵下不逾

矩居方在上流映空虛漾漾涵日靜悠悠影碎疑衝斗
光清耐觸舟珪璋分辨狀砂礫共懷愁願獻朝賓海縈
迴入御溝

樂天花前嘆云前歲花前五十二今歲花前五十五歲
課年功頭髮知從霜成雪君看取幾人得老莫自嫌樊
李吳韋盡成土注云樊絳州宗師李諫議景儉吳饒州
丹韋侍郎顛皆舊往還相次喪逝丹字真存登第歷職
至鎮州宣慰副使匱使尚書郎卒于饒州葬於常州樂

天爲誌

鄭餘慶

和黃門相公過石門洞云紫氛隨馬處黃閣駐車情嵌
壑驚山勢洲灘戀水深地分三蜀限關志百牢名琬琰

攀酬郢微言鼎飪情

黃門武
元衡也

餘慶字居業滎陽人善屬文嚴震帥山南西道奏置幕
府貞元末爲相憲宗立再相出鎮山南西道穆宗立加
檢校司徒卒

趙宗儒

宗儒字秉文鄧州人父驥有文名宗儒爲翰林學士驥改秘書少監父子並命驥少與殷寅顏真卿柳芳陸據蕭穎士李華邵軫善時語曰殷顏柳陸李蕭邵趙謂皆全交也宗儒貞元十二年爲相以文學歷將相位任崇劇然無儀矩以治生瑣碎失名和黃門相公詔還題石門洞云益部恩輝降同榮漢相還韶芳滿歸路軒騎出重關望日朝天闕披雲過蜀山更題風雅韻永絕翠崑

間黃門武
元衡也

周弘亮

除夜書情詩云何處風塵歲雲陽古驛前三冬不再稔
曉日又明年春入江南柳寒歸塞北天還傷知候客花
景對韋編

故鄉除夜詩云三百六十日云終故鄉還與異鄉同非
唯律變情堪恨抑亦才疎命未通何處夜歌銷臘酒誰
家高燭候春風詩成始欲吟將看早是去年牽課中

宏亮登貞元進士第

王播

王播少孤貧嘗客揚州惠照寺木蘭院隨僧齋殮僧厭
怠乃齋罷而後擊鐘後二紀播自重位出鎮是邦因訪
舊遊向之題名皆以碧紗幕其詩播繼以二絕句曰三
十年前此院遊木蘭花發院新修如今再到經行處樹
老無花僧白頭上堂已了各西東慙愧闍黎飯後鐘三
十年來塵撲面而今始得碧紗籠

出撫
言也

播字明敏父恕家揚州播貞元中與弟炎起皆有名穆宗立爲相居位無所裨益復失河北衆望不厭乃出爲淮南節度大和初復輔政時韋處厚以獻替自任而播專以錢穀進不甚與事居位四年卒

播爲淮南節度使遊故居感舊詩云昔年獻賦去江湄今日行春到却悲三逕僅存新竹樹四鄰惟見舊孫兒壁間潛認偷光處川上寧忘結網時更見橋邊記名姓始知題柱免人嗤

李德裕和云千騎風生大旆舒春江重訪武侯廬共提
龜印銜新授回憶鱣庭是故居取履橋邊啼鳥換釣璜
溪畔野花踈今來却笑臨邛客入蜀空馳使者車

周匡物

匡物字幾本潭州人元和十一年李逢吉下進士及第
時以歌詩著名家貧徒步應舉至錢塘乏僦舡之資久
不得濟乃題詩公館云萬里茫茫天塹遙秦皇底事不
安橋錢塘江口無錢過又阻西陵兩信潮郡牧見之乃

罪津吏

及第後謝座主云一從東越入西秦十度聞鷺不見春
試向昆山投瓦礫便容靈沼洗埃塵悲歡暗負風雲力
感激潛生草木身中夜自將形影語古來吞炭是何人

許玫

題鴈塔云寶輪金地壓人寰獨坐蒼冥啓玉關北嶺風
煙開魏闕南軒氣象鎖商山灞陵車馬垂楊裏京國城
池落照間暫放塵心遊物外六街鐘鼓又催還

政大和元年登第其兄弟瑄瓊皆高科

張碧

秋日登岳陽樓晴望云三秋綺練飛金盞洞庭波定平
如剗天高雲卷綠羅低一點君山礙人眼漫漫萬頃鋪
琉璃煙波闊遠無鳥飛西南東北競無際直疑浸斷青
天涯屈原回日牽愁吟龍宮感激致應沉賈生憔悴說
不得茫茫煙靄堆湖心又云范蠡帆張一掌風無人來
往繼其中

鴻溝云毒龍銜日天地昏八紘黷黷生愁雲秦原走鹿
無藏處紛紛爭處蜂成羣四溟波立鯨相吞蕩搖五岳
崩山根魚蝦舞浪狂鯁鯁龍蛇膽戰登鴻門星旗羽鏃
強者尊黑風白雨東西屯山河欲折人煙分壯士鼓勇
君王存項莊憤氣吐不得亞父斗聲天上聞玉光墮地
驚崑崙留侯氣魄吞太華舌頭一寸生陽春神農女媧
愁不言蛇枯老媪啼泪痕星曹定秤秤王孫項籍骨輕
迷精蒐沛公仰面爭乾坤須臾垓下賊星起歌聲繞繚

悽人耳吳娃捧酒橫秋波霜天月照空城壘力拔山兮
呼到此騅嘶懶渡烏江水新豐瑞色生樓臺西楚寒蒿
哭愁鬼三尺霜鳴金匣裏神光一萬八千里漢皇驟馬
意氣生西南掃地迎天子

美人梳頭云玉堂花院小枝紅綠窻一片春光曉玉容
驚覺濃睡醒圓蟾挂出妝臺表金盤解下叢鬟碎三尺
巫雲綰朝翠皓指高低寸黛愁水精梳滑參差墜須臾
攏掠蟬鬢生玉釵冷透冬冰明芙蓉拆向新開臉秋泉

慢轉眸波橫鸚鵡偷來話心曲屏風半倚遙山綠

題祖山人池上怪石云寒姿數片竒突兀曾作秋江秋水骨先生應是厭風雲著向江邊塞龍窟我來池上傾酒罇半酣書破青煙痕參差翠縷擺不落筆頭驚恠粘秋雲我聞吳中顧容水墨有高價邀得將來倚松下鋪却覆繒直道難掉首空歸不成畫

孟東野讀張碧集詩云天寶太白沒六義已消歇大哉國風本喪而王澤竭先生今復生斯文信難缺下筆證

興亡陳辭備風骨高秋數奏琴澄潭一輪月誰作採詩
官忍之不揮發

碧字太碧貞元中人自序其詩云碧嘗讀李長吉集謂
春折紅翠露開蟄戶其奇峭者不可攻也及覽李太白
詞天與俱高青且無際鵬觸巨海瀾濤怒翻則觀長吉
之篇若陟嵩之巔視諸阜者耶余嘗銳志狂勇心魄恨
不得攤文陣以交鋒觀拔戟挾輶而比矣

唐詩紀事卷四十五